

आकाशवाणी

खास-खास खबरां:-

- लोकसभा च अज्ज अध्यक्ष ओम बिरला होरें गी हटाने बारे प्रस्ताव पर चर्चा होने दी मेद। राज्यसभा च अज्ज ग्रामीण विकास ते पर्यावरण जंगलात ते जलवायु परिवर्तन मंत्रालयें दे कम्मकाज बारे चर्चा जारी रौहगा।
- सरकारै तेज रिफाईनरियें गी एल.पी.जी दा उत्पादन बधाने ते बादू उत्पादन गी घरेलू इस्तमाल लेई उपलब्ध कराने दा निर्देश दिता ऐ।
- पच्छिम एशिया च बनी दी तनोतनी दे चलदे सेबी नै निवेशकें गी शांत रौहने ते काहली-काहली च फैसला लैने कोला वचने दी सलाह दिती ऐ।
- अमरीकी राष्ट्रपति डोनाल्ड ट्रम्प होरें आखेआ ऐ जे ईरान खलाफ लड़ाई दी अवधि घट्ट होई सकदी ऐ कीजे अमरीका फैसलाकुन जित्त दा लक्ष तयार करा करदा ऐ।
- रुसी राष्ट्रपति पुतिन ते अमरीकी राष्ट्रपति ट्रम्प हुंदे बश्कार फोन पर गल्लबात च अमरीका- इजरायल-ईरान ते यूक्रेन संघर्ष पर चर्चा होई।
- महिला हॉकी विश्वकप दे क्वालीफायर राउंड च भारत ते स्काटलैंड बश्कार मकाबला 2-2 दी बरोबरी पर रेहा।

<><><><><><>

Parliament

लोकसभा च अज्ज अध्यक्ष ओम बिरला होरें गी हटाने सरबंधी प्रस्ताव पर चर्चा होने दी मेद ऐ। एह प्रस्ताव कांग्रेस पार्टी दे त्रै सदस्यें मोहम्मद जावेद- के.सुरेश ते मल्लुरवि हुंदे आसेया पेश कीता जाहग- जेकर एह प्रस्ताव सदन च पास होई जंदा ऐ- तां ओम बिरला होर कार्यवाही दी अध्यक्षता नेंई करगंन ते उ'नें गी होरनें सांसदे आंगर सदन च बौहना पौगा। पच्छिम एशिया पर चर्चा दी मंग गी लेइयै विपक्ष दी डंड-रौली दे चलदे कल अध्यक्ष होरें गी हटाने बारे इस प्रस्ताव गी सदन च कल नेंई रखेया जाई सकेया हा।

तोंआई राज्यसभा च अज्ज पर्यावरण- जंगलात ते जलवायु परिवर्तन मंत्रालय दे कम्मकाज दे बारे च चर्चा जारी रौहग। उप्परले सदन च ग्रामीण विकास मंत्रालय दे कम्मकाज पर बी चर्चा होनी ऐ।

<><><><><><><><>

Govt. LPG

सरकार ने तेज रिफाईनरियें गी एल.पी.जी उत्पादन बधाने ते बादू उत्पादन गी घरेलू उपयोग लेई उपलब्ध कराने दे निर्देश दिते न। एह पैहलकदमी ईंधन आपूर्ति च मौजूदा भू-राजनीतिक तनाऽ ते एल.पी.जी आपूर्ति पर लग्गी दी पाबंदियें दे मद्देनजर चुक्री गई ऐ। इक सोशल मीडिया पोस्ट च आखेआ ऐ जे पेट्रोलियम ते प्राकृतिक गैस मंत्रालय नै घरेलू उपभोक्ताएं लेई एल.पी.जी आपूर्ति गी प्राथमिकता दिती ऐ। कन्नै गै जमाखोरी ते कालाबजारी गी रोकने गी ते सिलेंडर दी दो बुकिंगें बश्कारे समें गी बधाइयै 25 दिन करी दिता गेआ ऐ।

<><><><><><><><>

SEBI Market

पच्छम एशिया च बददी तनोतनी ते अस्थिरता आहली स्थिति दे चलदे SEBI दे चेयरमैन तुहिन कांत पांडे होरें निवेशकें गी शांत रौहने ते काहली-काहली च फैसलें नेंई लैने दी अपील कीती ऐ। उंनं आखेआ कि भारत दे घरेलू बुनियादी कारक मजबूत न जेहडे इस चाली दी यक्को-तक्की आहली स्थिति च लचीलापन प्रदान करदे न। इस करियै ओ काहली-काहली च निवेश वापस लैने जनेई गलती नेंई करन।

<><><><><><><><>

PM Visit

प्रधानमंत्री नरेन्द्र मोदी होर कल केरल ते तमिनाडू दे दौरे पर होगन। केरल च ओ दिने डेढ बजे अरनाकुलम च 10 ज्हार 800 करोड़ रपे दी लागत आहलियें बक्ख-बक्ख परियोजनाएं चा किश दा उदघाटन करगन- केइयें दा नींह पत्थर रखगन ते किश गी राष्ट्र दे नमित करगन। एहदे इलावा किश परियोजनाएं गी ओह झंडी दस्सियै उन्दी शुरुआत बी करगन। एहदे मगरा उन्दा समारोह गी सम्बोधित करने दा बी कार्यक्रम ऐ। मगरा तमिलनाडू च प्रधानमंत्री मोदी होर 5 ज्हार 650 करोड़ रपें दियें बक्ख-बक्ख परियोजनाएं दा नींह पत्थर ते उदघाटन करगन। उत्थै बी ओ इक जनसभा गी सम्बोधित करगन।

<><><><><><>

Jatindra Singh -SCOVA Meeting

कार्मिक मामलें- सार्वजनिक शकैतें ते पिन्शनें सरबंधि केन्द्री राज्यमंत्री डाक्टर जितेन्द्र सिंह होर अज्ज नमीं दिल्ली च स्वयंसेवा एजेंसियें दी स्थाई कमेटी SCOVA दी 35मीं बैठक दी अध्यक्षता करगन। इस बैठक दा सरिस्ता पिन्शनें ते पिन्शनरें दी भलाई-बेहतरी सरबन्धी मैहकमे आसेआ- केन्द्र सरकार दे मलाजमें दियें चिंताएं ते मुद्दें गी हल्ल करने दे मकसद कन्नै कीता जा'रदा ऐ। मैहकमे दा आखना ऐ जे इस बैठक कन्नै नां छडा मलाजमें दियें दिक्कतें- शकैतें गी दूर करने च मदद होग-सगुआं नीतिगत तालमेल बधाने ते मजबूत करने च बी एह मती कारी दी साबत होग- जेहदे नै केन्द्र सरकार दे पेन्शनरें दा जीन मता सखल्ला ते सुविधाजनक बनी सकोग।

<><><><><><>

Trump -Iran War

अमरीका दे राष्ट्रपति डोनाल्ड ट्रम्प होरें आखेआ ऐ कि ईरान खलाफ लड़ाई दी अवधि घट्ट होई सकदी ऐ।

उ'नें इस्लामिक रिपब्लिक आसेया दुनिया च तेल दी सप्लाई रोकने दी स्थिति च लड़ाई तेज ते लम्मी खचोने दी संभावना थमां बी इंकार नेंई कीता ऐ। ट्रम्प होरें आखेआ कि ईरान युद्ध बड़ी तौले खत्म होई जाहग- पर कन्नै गै इब्बी आखेआ कि अमरीका नै अजें लोडचदी पूरी जित्त हासल नेंई कीती ऐ ते फैसलाकुन मुकदी जित्त दा लक्ष तयार करा करदा ऐ। ट्रम्प होरें मियामी कश रिपब्लिकन दे सांसदें गी आखेआ कि किश कठनाइयें पर काबू पाने लेई अमरीका नै पच्छिम एशिया च एह अभियान चलाया ऐ। ट्रम्प होरें अग्गे आखेआ कि अमरीका- ईरान दे बैलिस्टिक मिसाइल भंडार ते इन मिसाइलें दी दागने ते इंदे उत्पादन सरबंधी छमता गी खत्म करने दे लक्ष दे कोल-कच्छ पुज्जै करदा ऐ।

<><><><><><>

Putin -Trump Call

रुसी राष्ट्रपति ब्लादिमीर पुतिन ते अमरीकी राष्ट्रपति डोनाल्ड ट्रम्प होरें टेलीफोन पर गल्ल करियै ईरान दे खलाफ अमरीकी- इजरायल युद्ध ते यूक्रेन संघर्ष बारे चर्चा कीती। पुतिन हुंदे सलाहकार यूरी उशाकोव होरें दस्सेया ऐ जे दौनें नेताएं बश्कार कोई इक घटें धोड़ी विचार-बटांदरा चलेया। दिसम्बर 2025 दे बाद एह उन्दी पैहली गल्लबात ही ते इस सलाह-सूतर गितै गुजारश अमरीका दी तरफा कीती गेई ही। उशाकोव होरें दस्सेया जे राष्ट्रपति पुतिन होरें ईरान खलाफ अमरीकी- इजरायली लड़ाई गी तौले शा तौले ते राजनीतिक ते कूटनीतिक ढंगै नै खत्म करने पर जोर दिता। उ'नें इब्बी आखेआ जे पुतिन होरें ट्रम्प होरें गी “सम्पर्क रेखा” यानि “लाईन ऑफ कॉन्टेक्ट” दी मजूदा स्थिति बारे बी जानकारी दिती ते दस्सेया कि रुसी सैनिक उत्थे कामयाबी कन्नै अगडे बधै करदे ना।

<><><><><><>

Vaishnav Post Budget Webinar

सूचना ते प्रसारण मंत्री अश्विना वैष्णव होरें आखेआ ऐ जे भारत दी किएटर अर्थबवस्था आहला क्षेत्र मुलखै दी संस्कृति- खानपान ते होर केंई चाल्ली दे मकामी उत्पादें गी दुनिया दे सामने आहन्ने दा कम्म करा'रदा ऐ। “सबका साथ-सबका विकास लोके दियें आसें तांगे गी पूरा करदा”- विषय पर आयोजित बजट कोला बाद आहले इक वेबिनार गी सम्बोधित करदे होई वैष्णव होरें जोर देइयै आखेआ जे मीडिया मनोरंजन च नमीं टैकनोलॉजी इक अहम रोल अदा करै करदी ऐ। उ'नें इस गल्लै गी टकोहदे तौरा पर उजागर कीता जे “वेब्ज प्लेटफार्म” त्यार गै इस क्षेत्र कन्नै जुडे दे लोके गी अगडें बधने च मदद लेई कीता गेदा ऐ। उ'नें आखेआ जे “वेब्ज” हून दुनिया भरै च इक मानता रखने आहला मंच बनी चुके दा ऐ- जेहडा इस क्षेत्र च विकास ते नमें तौर-तरीके दे बारे च चर्चा करने लेई नीति-निर्धारके ते इस क्षेत्र दे बड्डे लीडरें गी किट्टे इक्के मंच पर आहन्ने दा कम्म कीता ऐ।

<><><><><><>

Hockey

एफ.आई.एच महिला हॉकी विश्व कप 2026 क्वालीफायर च भारत ते स्कॉटलैंड दे बश्कार मुकाबला 2-2 कन्नै बराबर रेया। भारतीय टीम पैहले हाफ तगर 2-1 शा अग्गे ही- पर स्कॉटलैंड नै त्रीये क्वाटर च शानदार वापसी करदे होई स्कोर बरोबर करी दिता। हैदराबाद च होए दा एह मुकाबला महिला हॉकी विश्व कप दे दंऊ क्वालीफाइंग टूर्नामेंट चा इक हा-दुआ टूर्नामेंट चिली दे सैंटियागो च आयोजित कीती गेया हा।

<><><><><><>